

Obraćanje visokog predstavnika Valentina Inzka na javnom forumu u organizaciji Evropskog pokreta u Bosni i Hercegovini

Milići, 23. februar 2018. godine

Značajniji angažman mladih će promijeniti stvari

Dame i gospodo,

Dozvolite mi da na početku zahvalim gospodinu Predragu Praštalu i gospodinu Stefanu Miliću na organizaciji ovog današnjeg foruma, kao i da zahvalim svima koji su danas došli da učestvuju u diskusiji. Organizatori su me zamolili da kažem nekoliko uvodnih riječi o aktuelnoj situaciji u Bosni i Hercegovini i o društvenom angažmanu i ulozi mladih.

Početak ovog mjeseca, usvojena je Strategija proširenja Evropske komisije za Zapadni Balkan, čime je još jednom potvrđena evropska budućnost ovoga regiona. To su dobre vijesti. Strategija uključuje niz inicijativa, a po mom mišljenju radi se o jednom od najsveobuhvatnijih programa koji smo vidjeli tokom proteklih deset godina.

Bosna i Hercegovina je danas zemlja koja živi u miru, a u njenu ponovnu izgradnju i izgradnju njenih institucija su uloženi veliki naponi. Iako smo se davno odmakli od faze rekonstrukcije, BiH se treba i dalje razvijati. Po mom mišljenju, početna tačka razvoja je efikasan i uspješan sistem vladavine prava u kojem su policija, sudije i tužioci profesionalci koji su nezavisni u obavljanju svojih poslova, a zapošljavaju se na osnovu kvalifikacija i radnog iskustva. To je sistem u kojem niko nije iznad zakona. Autoputevi će se graditi, a sa uspostavljenim i čvrstim sistemom vladavine prava, strani ulagači će biti zainteresirani da dođu u BiH. To znači veće mogućnosti zapošljavanja u realnom sektoru.

Ali, da bismo postigli taj cilj, potreban nam je i veći društveni angažman građana, uključujući i značajnije učešće mladih na izborima. Društveni angažman se odnosi na učestvovanje u aktivnostima tamo gdje postoji društveni interes. To može biti centar za mlade, igralište za djecu, fudbalski stadion ili centar za obrazovanje odraslih ili bilo koje drugo mjesto koje bi moglo poboljšati stanje u vašoj sredini. Vašim glasom, putem inicijativa prema skupštinama općina, možete promijeniti stanje u sredini u kojoj živite.

To me dovodi do činjenice da je ovo izborna godina pa bih vas ovom prilikom želio pozvati da na dan izbora iskoristite svoje demokratsko pravo da izađete na birališta i glasate!

Glasanje je takođe način da započnete društveni angažman, a utvrđeno je da društveni angažman donosi više sreće, zdravlja i blagostanja!

Iz studije o mladima koja je provedena u Bosni i Hercegovini, vidim da je 63% mladih nezaposleno, što znači 180.000 nezaposlenih mladih ljudi, dok 115.000 studira na fakultetima. Štaviše, ta studija pokazuje da samo 50% onih koji su zaposleni rade u profesiji koju su sami izabrali; 25% je napustilo školu, 27% uopšte ne traži posao, a samo 10% ih se bavi nekom vrstom volontiranja.

Povrh svega, ubrzan je trend odlaska ljudi iz Bosne i Hercegovine, uključujući i mlade, koji traže bolji život negdje drugo.

To nije dobra slika!

Volio bih da vidim da vlasti u BiH podržavaju mlade, čak da 2018. proglase godinom mladih tako što će raditi na strateškom pravnom okviru sa ciljem zaustavljanja daljeg odlaska mladih građana BiH. To se neće desiti bez ciljane akcije.

Okrenuo bih se političarima i rekao, uradimo to; okrenuo bih se mladima, studentima, zaposlenima ili nezaposlenima – organizujmo se kroz društveni angažman i radimo na tome.

Posebno bih želio apelirati na mlade iz različitih sredina, različitih zanimanja, različitih kantona i entiteta da nađu oblasti zajedničkog interesa i da zajedno rade na tome da se njihov glas jasnije čuje.

Ljudi svih doba imaju različite identitete i perspektive, ali ako možete naći oblasti u kojima imate zajedničke interese – veću stopu zaposlenosti, manje korupcije, bolje obrazovne mogućnosti – onda možete promijeniti stvari nabolje.

Ja bih se lično angažirao na tome, zajedno sa svojim osobljem, ako je potrebno. Međutim, ne čekajmo da neko drugi to uradi, uključimo se sada!!!

Hvala vam.